

Jaribio la Hamu ya Chakula

Bali nautesa mwili wangu na kuutumikisha; isiwe, nikiisha ~~ku~~ wahubiri wengine, mwenyewe niwe mtu wa kukataliwa—1 Wakorintho 9:27.

Baada ya ubatizo Wake Mwana wa Mungu aliingia kwenye nyika ya huzuni, pale ili kujaribiwa na Shetani. Takribani majuma sita alistahimili maumivu makali ya njaa.... Aliutambua uwezo wa uchu wa chakula juu ya mwanadamu; na kwa niaba ya mwanadamu mwenye dhambi, Alibeba jaribu la karibu sana iwezekanavyo juu ya jambo hilo. Hapa ushindi ulipatikana ambao wachache wanaweza kuufurahia. Nguvu itawalayo ya upotovu wa uchu wa chakula na dhambi mbaya ya kuiendekeza inaweza tu kueleweka kwa urefu wa mfungo ambao Mwokozi wetu alistahimili ili kwamba aivunje nguvu yake....

Hali ya kutokuwa na kiasi ipo kwenye msingi wa maovu yote ya kimaadili yanayojulikana kwa mwanadamu. Yesu alianza kazi ya ukombozi pale tu ambapo uharibifu ulianza. Anguko la wazazi wetu wa kwanza lilisababishwa na kujihusisha katika uchu wa chakula. Katika ukombozi, kuukataa uchu wa chakula ni kazi ya kwanza ya Kristo.

Mwana wa Mungu aliona kwamba mwanadamu peke yake asingeweza kulishinda jaribu hili gumu.... Alikuwa duniani ili kuunganisha nguvu ya Mungu na juhudi zetu za kibinadamu, ili kwamba kupitia kwa nguvu na uwezo wa kimaadili Anaotupatia, tuweze kushinda kwa niaba yetu. Lo! Ni unyenyekevu wa ajabu tena usio kifani kwa Mfalme wa utukufu kushuka chini duniani ili kustahimili maumivu ya njaa na majaribu makali ya adui mwenye hila, ili ampatie mwanadamu ushindi usio na kikomo. Huu ni upendo usio na kifani. Lakini wema huu mkuu unaeleweka kidogo mno kwa wale ambao ulifanywa kwa ajili yao.

Haikuwa mateso ya maumivu ya njaa pekee ambayo yalifanya mateso ya Mkombozi wetu kuwa makali yasiyoelezeka. Ilikuwa ni hisia ya hatia iliyotokana na kuendekeza uchu wa chakula ambayo imeleta hatari hiyo kubwa kwa ulimwengu, ambayo iliisonga nafsi ya Mwana wa Mungu vikali sana....

Huku asili ya mwanadamu na uzito wa kutisha wa dhambi zake ukimsonga, Mkombozi wetu alishinda nguvu za Shetani juu ya jaribu hili kuu liongozalo, ambalo linahatarisha roho za watu. Ikiwa mtu atashinda jaribu hili, angeweza kushinda katika kila hatua.